

Ministry of Home Affairs toh ITLF kimu



Apaisa November 09, 2023 zingkal dak 10:30 am vel in Lamka HQ veng Intelligence Bureau (IB) office ah Ministry of Home Affairs, New Delhi akipan Joint Director IB (NE) Dr. Mandeep Singh Tuli toh SoO interlocuter A.K. Mishra ITLF toh kimu uhi. Hiai hun ah Lamka district DC Dharun Kumar, Joint Director IB, Imphal Gnanasambandan leh Asst Director, IB Lamka Soiminthang Thangsing le tel uhi.

ITLF in misivuina toh kisai Joint Philanthropic Organisation (JPO) khut a koih ahih man in JPO toh kimu masa uhi. Salphate vuina di toh kisai hun sawt kuamtak genkhawmna nei ua, thupukna a laktheihlough ziaak un houlimna sunzom ding uhi.

Delhi a kipan i gam hong sik Ministry of Home Affairs a heutu tegel ITLF makai ten vaidawwna in puandum silhsak uhi. A paisa August 08 ni a New Delhi a Union Home Minister Amit Shah toh ITLF heutute kihouna etkikna nei khawm uhi.

Singtanggam a Meitei State Force-te omsaklough di toh kisai enkikna nei ua, ITLF in State forces te omsaklough di chih a phut uh himahleh Amit Shah in state tung a thilteng Center in thu neilou ahih man in, na haksatna uh ka theisiam ua, huai ziaak in Meitei State force-te amau thuthu in a gamtang theikei ding ua, Central force makaih leh etkaina nuai in a om ding uh ana chi hi. Hiai kithukimna pen tutung Moreh thiltung ah zuih hilou ahih dan ITLF makai ten gen uhi. Hiai toh kisai MHA lam in hihdiklough leh poi a sak thu uh gen uhi. Maban a hiai bang thil atun nawnlough na ding a panla uh ahih dan gen ua, Moreh mun a Kuki-Zo police officer makai khat koih sawm ahih dan Dr. Mandeep Singh in gen hi.

CBI leh NIAte gamtatna toh kisai lungkimhuailou leh khentuam nei ahih dan ITLF in genzom ua, Meitei khangnou nih a omna theihlough sang a huaise zaw Kuki-Zo ten kituak ahih dan gen in David Thiek, Tongsingte nuta, Car Wash ate, Naked

Paradete, MLA Vungzagin leh a driverte leh a dangdangte taklang ua, amaute case CBI/NIA in suizuilou ahihdan gen uhi. MHA lam in justice mi teng tung a hong tung ngeingei di ahihdan gen in, a tung hak leh baih deuh om mah leh government akipan justice om veve di ahi chi in, hiai toh kisa CBI leh NIA te nohna pe ding ahih dan gen uhi.

Imphal jail a tangte toh kisai khakkhiakna di leh transfer di toh kisai ITLF in ngetna a piakte government in sepsuahna a neih khitte tung ah kipahthu gen in, tua Jail a omlaite khakkhiakna leh transfer dite bohzi tou ding in ngetna bawl uhi.

Imphal valley a Meitei ten galvan tampi a gukkhiak uh toh kisai tomkikna ding in ITLF makai ten nohna nei ua, MHA heututen hiai toh kisai panla gige ahih dan gen uhi. Nou le Lamka a na lakte uh na piakkik ding uh chi ua, hiai toh kisai in ITLF makai ten Imphal aten a piak khit vek nini a pekik di ahih dan uh gen uhi.

IDP te relief di toh kisai government lam a kipan panlak dan ITLF in dong ua, hiai toh kisai in Lamka DC in panlaknate leh maban a kalsuan di dante gen hi. Helicopter service toh kisai leng houlim ua, tua service omsa pen kal khat a khatvei kia hi a, nihvei bek hithei leh chi uhi. Tua ban ah singtang district dang Kangpokpi leh Moreh toh kikawmtuahna poimoh ahih man in Lamka to Kangpokpi leh Lamka to Moreh helicopter service le Union Home Minister toh genkhitsa pen hon bohzi ding un gen uhi.

AK Mishra kiang a political talks dinmun dotna ITLF in bawl a, aman a genna ah SoO toh talks 2005 akipan kinei pen kisunzom tou zel in, tu tan in SoO agreement toh kisai in Government neukha le tolh lou a, dingkip ahih dan gen hi. Tutung buaina omzoh in SoO group in government kiang ah separate administration definition genchetna bawl ua, demand le pelut khin ahih dan gen hi. Tu dinmun a Government approval ngak ahih dan gen hi. Political solution om theih na dia peaceful environment a om poimohna gen a, violent a hong om chiang a political solution lampi nawngkaisak ahih dan gen in, democratic tak a political demand ngetna bawl zaw ding in hanthawwna bawl hi. Government in Manipur a Kuki-Zo ten Separate administration a neih ding deihsak ahih dan gen kawm in, hichi bang solution om di chiang in a sukkhak om teitei

a, hiaite hoihtak a velchet hi a, ngaihtuah ngitngat ngai ahihman in hun lazek ding ahih dan leng gen hi. Bang teng hileh government ah muana nga un la, ahi thei tan separate administration ngetna in violent zang zaw lou a, democratic means of protest nei zaw dia a hon deihsakthu gen hi.

ITLF makaiten kou peace deihsak leng le ka melmaten hon attack chiang ua ka ki defend ngai ua, huai chiang a violent om zel ahi chi ua, huai ziaik a peace om tatak theihna dia solution a om masak di ahi chi uhi.

Huchi in, sun singpi dawnkhawm in houlimna vantang nei in kikhen uhi.

Aizawl ah Zo United in meeting nei

Apaisa 08 November 2023 ni in Zo United makaiten Mizo Upa Pawl (MUP) toh meeting nei ua, hiai huan ah Zo United ten MUP tung ah kipahthu gen ua, frontline mess kha bangzah hiam panpih ding in ngen uhi.



Nitaklam dak 5 in Aizawl club ah Zo United executive members, SoO groups, MLA leh invitees tamloute toh thu tuamtuam houlim khawm uhi.

09 November 2023 ni in CYMA office ah Mizoram NGO Coordination committee toh Zo United makaiten meeting nei ua, maban panlak di dan houlim khawm uhi.

Tengnoupal panpihna

A paisa 1st November 2023 ni a Zo United in Philanthropic organisation te kiang a Tengnoupal a unaute panpihna ngetna a bawl toh kisai in Young Vaiphei Association (YVA) in Rs. 1,40,080 leh antang Kg 3120 dongkhia ua, Young Paite Association (YPA) in Rs 5, 20,801, antang bag 40, puansilh nikten bag

48 leh sathau bottle 60 khonkhia uhi. Young Mizo Association (YMA) akipan in Rs 70350 lut a, Kuki Khanglai Lawmpi (KKL) akipan in antang bag 200, Hmar Youth Association (HYA) akipan in antang bag 15, dal bag 5, sathau tin 2 leh chi bag 1. Mate Tribe Council (MTC) akipan in Rs 20,000, Gangte Youth Organisation (GYO) akipan in Rs 40,00 leh antang bag 8 panpihna lut a, Zou Youth Organisation (ZYO) akipan in antang bag 69 leh dal bag 1 lut hi.

IG AR toh meeting

Apaisa 08 November 2023 nitaklam dak 7:30 in Sector 27 AR, Tuibuong ah IGAR General Rajan Sheravat in ITLF tel in CSO tuamtuum kimuhpih hi. Hiai hun ah Manipur a "Cycle of violence" bang chi beisak ding chih thulu zang in kikupna neih in om hi. CSO lam a kipan in Manipur a violent beina ding in CM Biren Singh tawpsak himasa hen la, huai zoh a vanzat Arambai Tenggol mat hi leh chi in gen ua, phaizang ah AFSPA koih ding in genpih uhi

General Rajan Sharavat in violent tawpsan a democratic tak a demand bawl zaw ding in ngetna bawl hi. Moreh vai a Meitei commando te gamtatna siamtan lou a, maban a hoihtak a panla ding uh ahih dan gen hi.

Panpihna hong lut

ITLF Relief & Medical department kiang ah panpihna hong lut tou zel hi.

04 November 2023 ni in Lamka Second Hand Belt Trader akipan in antang bag 40 panpihna hong lut a, EAC akipan in antang bag 5, Parish Pastoral Council, Good Shepherd Parish, Lamka akipan in antang bag 50, dal bag 30 leh blanket 960 hong lut hi.

09 November 2023 ni in Dr. Ng Seanbawi & family, Chiengkongpang akipan in antang bag 20 hong lut a, EBC Headquarter, Dorcas Hall, New Lamka akipan in antang bag 100, dal bag 30 hong lut hi.

10 November 2023 ni in Pu Letkhogin IAS akipan in antang bag 10 panpihna hong lut hi. Amaute kipiakhohna tung ah ITLF in kipahthu gen hi.

Meitei ten Sugnu buluh

10 November 2023 zinglam dak 7:20 am vel in Sugnu area sung a om Leisan, G. Songgel leh Kanaanphai

munte Arambai Tenggol cadres ten galkap uhi. Bomb leh mortar zang uh ahih man in mipite patausak mahmah hi.

Hiai mun a Assam Rifle om ten Arambai Tenggol te masawn di kham ua, a lutzohlouh phet un a kiang nai a Meitei khuate a kik uhi. Report kimu tan ah kuamah a liam leh si omlou hi.

Dharna paitou zel

ITLF Women Wing makaihna nuai a lungkimlouh lahna in kalteng kiphinna dharna lamzangtak in paizom zel hi. A paisa date 9 November 2023 ni a hunzatna ITLF Women Wing lam akipan in Nu Manliankim leh Julie Mawi te makaihna nuai ah neih in om a, Andhra Pradesh a pan tangthupha phuangkhe ding in Pastor Madhukar leh a teamte hong kuan uhi. May 3 buaina a pan amau saptuum ten thumna a hong phawk gige uh ahihdan gen in Relief camp a ding blanket 700 val Relief camp omna mun mahmah ah pekhe khin uh chi a, tutung nihvei hongphakna ahihdan gendawk in Jesu a muanna ngak mah poimoh tinten ahi chi'n mipi paikhawmte hanthawn hi. Amaute hong kithuahpih Thansang Guite in pau lehkhiaakna mohpua in, Dr. Pautinthang Chongloi in leng hong zui hi.

Motivation speech Rev. Dr. Mark Ai, Associate Prof. Parish Priest, Tuibuong in haksatna tungtawn a Toupa melmuh dingdan lamlahna nei in, Nu Thiemnu in tawpna thumna nei in hun zang zou uhi.

Hunzatna neih ahihlai in Master Benhavi Gangte (9) in tunging toh phatna lasak leh, Kanaan Veng Unit ai-oh a phatna lasa Nungak Nemzoupui te zai-awih in mipite hulum sak zou mahmah hi.



COMING SOON

IN PHOTO MATTE PAPER QUALITY

₹599
ONLY



#MANIPUR MAYHEM KEY PLAYERS & EVENTS

A BOOK BY INDIGENOUS TRIBAL LEADERS' FORUM (ITLF)

FEATURES

THE TRIBAL NARRATIVES - STORIES FROM VICTIMS - DAILY INCIDENT REPORTS
ARTICLES FROM GUEST WRITERS - POEMS - STATISTICS - AND MANY MORE

UPDATED TILL 10 NOVEMBER 2023



150
CONFIRMED DEATHS



200
VILLAGES BURNED



7000+
HOUSES BURNED



360
CHURCHES BURNED



41425
DISPLACED PERSONS



204
RELIEF CAMPS

RELIEF SUPPORT

Office: ITLF Secretariat, Hiangtam Lamka

Contacts:

Mangcha Thangzom – 8837368373 (Convenor)

V. Gouthianmuan - 9862086583 (Co-Convenor)

FINANCIAL SUPPORT

ITLF Joint Bank Account:

Name: Henkhopao Haokip & N. Vialkhanthang

Account No: 41912626404

IFSC: SBIN0064016 | Bank: SBI Salbung Branch